

重印陝西中部縣志

民國廿四年
邵力子



藝文

中部文獻之邦著作富於明時而黃帝橋陵在焉達人墨客多所題咏

本朝崇文重士詞賦相高可謂彬彬郁郁矣作藝文志

明洪武四年御製祭文

皇帝謹遣中書省管勾甘敢昭告於黃帝軒轅氏朕生後世爲民於草野之間當有元失馭天下紛紜乃乘羣雄大亂之秋集衆用武荷皇天后土眷祐遂平暴亂以有天下主宰庶民今已四年矣帝生上古繼天立極作烝民主神功聖德垂法至今朕興百神之祀考帝陵墓於此然相去年歲極遠觀經典所載雖切慕於心奈稟生之愚時有古今民俗亦異仰惟聖神萬世所法特遣官奠祀修陵聖靈不昧其鑒納焉尙饗

皇清順治八年四月初七日祭告黃帝文

自古帝王受天明命維道統而新治統聖賢代起先後一揆功德載籍炳若日星明禋大典亟宜肇隆敬遣專官代將牲帛

神其鑒享

康熙元年祭告文

帝王繼

天立極功德並隆治統道統昭垂奕世朕受

天眷命紹纘丕基庶政方親前徽是景明禋

大典亟宜肇修敬遣專官代將牲帛爰昭啓薦之忱聿備欽崇之禮

伏維恪歆尙其

鑒享

雍正元年祭告文

自古帝王繼天出治建極綏猷莫丕澤被生民仁周海宇維我

皇考峻德鴻勳媲美千古顯謨承烈垂裕後昆朕以渺躬纘膺大寶
當茲嗣位之始宜修享祀之儀特遣專官虔申昭告惟冀時和歲稔
物阜民安淳風徧洽乎寰區厚德常敷於率土尙其歆格鑒此精誠
乾隆四十五年祭告文

惟

帝體元贊化建極綏猷澤被生民勲垂奕世簡編明備累朝之治法
相傳弓劍留藏千載之英靈如在茲以朕七旬展慶九有騰歡懋舉
崇儀特申昭告緬當日之歷圖受錄每深景仰之忱撫此時之集嘏
凝禧彌切祇寅之念冀佑邳隆之運永貽仁壽之庥式薦精禋惟祈
鑒格

嘉慶五年祭告文

自古帝王受籙膺圖乘時御宇罔不憲天立極宥密單心故能澤洽萬方德昭百世朕承鴻典景仰前徽茲以嘉慶四年十一月二十六日恭奉

高宗法天隆運至誠先覺體元立極敷文奮武孝慈神聖純
皇帝主配享

園邱禮成特遣專官虔申昭祀惟冀孚佑皞熙之運益昭安阜之風
鑒此精禋尙其歆格

重修軒轅黃帝廟募緣序

劉爾懌

萬物果無始乎天生聖人何爲也萬物能忘其始乎人祀聖人何爲也聖人羣祀於人乎首出御世皆聖人也惟初始者尊於世三皇以及羲軒皆有功於天地之始也唯定制度者切於民予於是知黃帝之功在萬世爲凡有血氣者之永思不忘也昔者穴居野處帝始作宮室昔者汙樽抔飲帝始制器用昔者結繩而治帝始有書契文字而且命大撓作甲子伶倫造律呂興衣裳之制習干戈之用利賴至今者固其功也夫功者切乎民者也民享其功思其所從來而廟者興矣中部有黃帝廟蓋黃帝葬橋山因其地而祠之禮也初於漢至宋而益飭歷元明迄今歲春秋有司黜聖嚴祀事三歲則

天子命官鬻帛載御祝持節來太守先期役一州三邑之人撤朽剝蝕植欹築頽工告成功然後太守率鄜刺史及洛中宜三令屆時而

齋宿焉而

天子踐位初則又特遣大臣祭以告始以故廟制視古來帝王廟獨宏敞且實枚焉順治辛卯

先帝親政宗伯王公覺斯以帝命肇祀於廟今十有七年矣歲久祀缺廟遂頽巡撫都御史賈公惻然弗自寧也以檄河西副憲副憲鮑公親詣廟謁覽焉而嘆曰事孰有急於此者乎乃茲頽焉弗修也於是下令庀材程工太守王公則曰是不可重勞民迺捐俸資之而司李劉公謂予曰事集於人功成於衆子何言之予曰功崇者世澤永者思今孰不居爾宮室利爾器用習爾文書而律歷而衣裳此世者之道而思之永者也則誰不思飭厥祠矧是役也憲司身其事太守與公嘗董率之夫上所令下奉唯謹也上所爲下弗力恤也彼文武將吏有事於延之封域者原集其資以襄厥事亦義所不得辭也詩

曰敬共明神按祀典廢厥祠祀不舉者不敬不敬者削以地禮諸侯祀封內山川暨古帝王陝以西岳曰華鎮曰吳古帝王自周文武以下祀各以其地黃帝之祀惟上郡封內則屬茲庶執事可不敬成祀事歟且人未有不念其所自始者攷氏族譜世系多出自黃帝肅爾宮廟又人本乎祖之義也倘人不力愛衆弗貲吝羣相與以有成則不惟有以仰副諸公敬共明神之意而他日者天子修廢典舉三歲大祭秩宗來將禋事仰瞻闕沍不且大有光於朝廷哉惟庶執事勉之

改建 關帝廟記

邑侯 衛汝霖

王起於晉河東解梁條山之北鹽池之南風氣攸萃之所古相風后
出焉形修髯美俊偉剛烈文武智勇與尋常迥異及會逢劉張皆不
世之奇遇故輔大漢討吳魏大節大義凜凜然真可以參天貫日而
正氣至今猶存余隆慶壬申春知中部因謁廟而詢 王祠僉曰橋
陵東有祠而僻遠縣治北有祠而隘陋遂慨然欲創建之乃擇諸古
坊州之故墟得其地則生員某舊址以縣治北之祠易焉南北長一
十七丈東西八丈一尺興工閱四月而告成正殿三楹門如其數而
中豎牌坊高其階級雖比之故里之祠巍巍峨峨廓如煥如者不侔
較舊祠之隘陋僻遠大有間矣噫嗣是後 王之神靈以妥鄉之奉
祀有所萬年

皇朝亦因以佐鎮於不替矣余故謹記其歲月

五老社約

劉爾怡牛光斗蘭薰張鳳袍張鳳翀先後俱筮仕縣令不以五斗折腰皆掛冠隱於橋山沮水之間人號爲五老每

遇花朝月夕令節芳晨聚飲

永年張鳳袍作五老社約

張鳳袍

曲水流觴世美蘭亭之盛竹林樂志人傳河內之賢誦讀生平愧未
大酬夫君父林泉終老聊將結好於友朋覩易邁之韶華莫厭入唇
濁酒撫隨時之令節正當雅集論文謹擇中秋敬延上客園中秋色
喜得平分其半天上蟾光快瞻適際其圓對桂影而開樽料多逸興
感葭蒼而作賦應繫遐思祇約五人每旬一會旣無固陋離羣之嘆
不憂一日三秋綽有談心把臂之樂期卒餘年百歲志同道合賭酒
彈碁比飲中之八仙雖少三子較商山之四皓尙多一人五臣邈矣
自識非虞廷稷契之班五老遐哉差堪侔宋代衍平之輩山餉野藪
勝如鼎食鐘鳴壺酒杯羹不減簞瓢飲水約期有定速命高軒凡我

同人毋虛此舉

祭楊中丞退庵文

劉爾怡

嗚呼古所謂非常之人者蓋必有過人之才與過人之識矣顧才非氣不充識非學不贍養之於平日而發之於臨時故能臨大事而惑當大任而不懼予嘗以此觀退庵竊得其一二大端敢自附於知公而公亦或有以信余也公少負氣節穎敏絕倫與余同領鄉薦並轡入都門見公讀書一目數行下爲文雄健自喜與海內之士談古論今旁若無人余固心折於公矣旣而登巍科令東明不拘小節詩酒自娛而案無畱牘庭鮮繁冗以治行高等擢西臺世祖章皇帝方銳意太平聽諫如流所條奏皆當世急務余嘗讀其奏議又未嘗不心折於公也其彈劾平西也當是時

上方隆重勲臣在諸親王右公若逆知數十年以後西方反者必在平西迄今讀防微杜漸一疏如數計而龜卜之也舉朝危之公不

顧也天下危之公不顧也嗚呼季良在隨楚子心忌汲黯在漢淮南謀折彼吳逆者遲之數十年不敢一萌邪心及鴟張江上逡巡觀望終於膏斧鑕者以公先有以奪其魂也夫

國家以師武臣力智者竭其謀勇者効其才兵連禍拏罄天下之財力顧乃出於防微杜漸一疏之後方是時知與不知莫不多公之先見而服其膽氣也嗚呼犯逆鱗挫權姦古之直臣以死爭是非於殿上者比比矣然方九齡知安祿山王猛知慕容垂由今視昔惟公一人而已使公當日計功利較死生內阻於友朋之苦口外懾於強藩之陰中則氣不充氣不充則志奪於疑忌而情沮於憂患安在其臨大事當大任苟利社稷死生以之耶然則公立陟顯秩兩撫湖廣江南固大臣交章力薦亦公忠諒強諫先事預防有以自結主知也方公撫楚時余旣老且病不能輕千里親見公奇猷偉績然跡其生平

亦可謂卓然不朽矣惜也以公雄深雅辯之文高妙洒脫之才處富貴一如貧賤之守不得致政歸老林泉與吾輩故舊老友銜盃酌唱樂其餘年也悲夫悲夫顧名振於後世道行於當時爲

本朝一代之名卿公亦可以自信而余言亦竊有以見信於公也尙
饗

